

նակցում էին տեղական թուրքերը, որոնցից կարող եմ տալ վաճառականներ Համզայի, Հիւսէյին Կուլիի, Իբրահիմի և ուրիշների անունները: Կոտորածն ունէր բոլորովին կազմակերպւած բնոյթ: Անկասկած, նախաձեռնութիւնը բխում էր բարձր իշխանութիւնից, իսկ թալանին ու կոտորածին մասնակցում էր տեղական պաշտօնէութիւնը: Ի հարկէ, եթէ իշխանութիւնը կամենար, ո՛չ թալան կը լինէր և ո՛չ կոտորած»:^{*})

Ագուլիսի կոտորածը մեծ հարւած էր հայ ժողովրդի համար, և հասկանալի է այն յուզումն ու ցասումը, որ առաջ բերեց հայկական բոլոր շրջաններում: Լուրը Երևան հասաւ դեկտ. 29-ին, Գորիսից: Երկու օր յետոյ, դեկտ. 31-ին, հնդկաւրոպական հեռագրագծով հեռագիր ստացւեց Թաւրիզից, թէ՛ «Քարտէսի վրա Ագուլիսն այլևս գոյութիւն չունի. Ներսէս եպ.»: Յունւ. 4-ին Մելիք-Թանգեան եպ.-ը հաղորդեց, թէ՛ «Ամենքը կոտորւած են: Մանրամասնութիւնները թոյլ չեն տալիս»:

Նոյն օրերին Հայաստանի կառավարութիւնը Բագուից էլ տեղեկութիւն ստացաւ, որ այնտեղ արտ. գործ. նախարարի օղնական Սան Թեքինսկիի նախաձեռնութեամբ յատուկ խորհրդակցութիւն է գումարւել, որին մասնակցել էին և Ուսուպրէզովն ու Սան Սոյսկին և որտեղ մշակւել էր Հարաւային Չանգեզուրը, Գողթնը, Օրդուբաթն ու Նախիջևանը Ազրբէջանին ու Թիւրքիային հաւատարիմ մարտական մահմետական տարրերով բնակեցնելու և այդ նպատակով, առաջին հերթին, «Նախիջևանի շրջանի հարաւային մասը հայ տարրից մաքրագործելու» ծրագիրը: Ագուլիսի կոտորածը այս ծրագրի սկզբնական քայլն էր. Ներքին Ագուլիսում կոտորւեց մօտ 400 մարդ, Վերին Ագուլիսում 1000: Ողջ մնացին միայն մի քանի տասնեակ կանայք ու օրիորդներ, որոնք նւէր տրւեցին թիւրք սպաններին ու կոտորածի ղեկավարներին. այսպէս, վաճառական Փանեանի 16 ամեայ գեղեցկուհի աղջիկը բաժին հասաւ Էդիֆ րէյին:

Հայաստանի կառավարութիւնը ստացւած տեղեկութիւնները օրը օրին հաղորդեց գնդ. Հասկելին ու դաշնակիցների ներկայացուցիչներին և բողոքներ ուղարկեց Բագու: Ազրբէջանի կառավարութիւնը օկզբում ուրացաւ եղելութիւնը, ապա հեռագրեց, թէ՛ «լուրերը չափազանց մեծացւած են» և, ի վերջոյ, յունւ. 23-ին միայն, Հայաստանի կառավարութեան վճռական մերկացումների ու բողոքների տակ, ստիպւած եղաւ ընդունել փաստը, որը, սակայն, արդարացնում էր նրանով, որ կոտորածը եղել է Էջմիածնի, Երևանի ու Չանգեզուրի շրջաններից հայերի ձեռքով քշւած մահմետական գաղթականների կողմից:

Հայկական բողոքները իրական դարման չհասցրին և Հասկելից ու դաշնակից ներկայացուցիչներից. նրանք սահմանափակւեցին միայն ցաւակցութիւններով, պաշտօնական նկատողութիւններով, խորհուրդներով ու սաստումներով և գործնական միջամտութիւնից խուսափեցին. երկու գիւղ էր աւերւել, 1000—1500 մարդ էր կոտորւել — արժէ՞ր դրա համար աշխարհ իրար խառնել...

^{*}) Տե՛ս Զանգեզուրի ու Գողթնի «Գործ»-ը Հ. Հ. Պատմիրակութեան դիւանում: